

## Vijećnička pitanja

**Armin Bašić:** je postavio dva vijećnička pitanja. Prvo pitanje je postoji li mogućnost da se na Facebook stranici Općina Kakanj – načelnik objavljuju konkursi i javni pozivi za zapošljavanje koje raspisuje Općina i općinski načelnik kao što se objavljuju javni pozivi javnih preduzeća čiji je osnivač Općina Kakanj, a u cilju bolje informiranosti svih građana? Drugo pitanje je ko je investitor gradnje puta od naselja Hrasnice pored vidikovca Hurije do mjesta Trijepće u MZ Koprivnica? Da li je izdata urbanistička saglasnost ili građevinska dozvola za navedene radove i postoji li projektna dokumentacija za iste, te ko je vršio nadzor nad izvođenjem radova na izgradnji navedenog puta?“

**Mirza Fazlić (odgovor):** je rekao da Služba za privredu, urbanizam i zaštitu okoline nije zaprimila nikakav zahtjev vezano za predmetni put, što znači da Služba nije izdala nikakve dozvole, ne zna ko je investitor radova, niti su upoznati sa tim aktivnostima, te je rekao da je nejasno zašto se Služba za privredu, urbanizam i zaštitu okoline dovodi u vezu sa izgradnjom predmetnog puta.

**Armin Bašić:** je rekao da je pitanje postavljeno prije dvije sjednice, a tek sad je odgovoreno, te je dodao da je nadležna služba davno mogla dati odgovor da nije upoznata sa predmetnim radovima.

**Mirza Fazlić (odgovor):** je kazao da je Služba u proteklom periodu pokušavala pronaći podatke da li je izdavala ikakve dozvole za izvođenje predmetnih radova, te sada odgovorno trvdi da Služba za privredu, urbanizam i zaštitu okoline nije upoznata sa radovima.

**Dževdet Huskić:** je postavio dva vijećnička pitanja. Prvo pitanje je kakav je status aplikacije Općine Kakanj za projekat „Rekonstrukcija toplovodnog sistema daljinskog grijanja u Kaknju i proširenje sistema daljinskog grijanja na prigradsko područje“ u Programu javnih investicija Federacije BiH za 2025. godinu? Obzirom da se bliži kraj godine, tražio je informaciju o statusu aplikacije za navedeni projekat i izjašnjenje o očekivanjima da li će projekat biti uvršten u Program javnih investicija Federacije BiH za 2025. godinu? Također, tražio je da mu se omogući uvid u projekat i dodatno pojasni na koji će se način odnositi dio „...proširenje sistema daljinskog grijanja na prigradsko područje“ iz naziva projekta. Drugo pitanje je ko i po čijem nalogu vrši sječu platana u naselju Termoelektrana? Na osnovu informacija kojima raspolaže od mještana naselja Termoelektrana, do sada su posječena 4 velika i najmanje 10 manjih platana. Zanima ga ko je izdao nalog, na osnovu kojeg razloga i ko vrši sječu platana?

**Adnan Demir:** je postavio vijećničko pitanje koji su ukupni procijenjeni troškovi izgradnje nove zgrade Hitne medicinske pomoći i iz kojih budžetskih izvora se planira finansirati investicija? S obzirom da je idejni projekat prezentiran javnosti putem društvenih mreža, umjesto Općinskom vijeću kao osnivaču Doma zdravlja, tražio je da mu se daju dodatna pojašnjenja i odgovori na pitanja: - zašto se pristupilo izradi idejnog projekta nove zgrade HMP prije nego što su riješeni dugogodišnji infrastrukturni i kadrovski problemi Doma zdravlja; - ima li Općina urađenu sveobuhvatnu analizu trenutnog stanja Doma zdravlja po pitanju kadrova, opreme i prostornih kapaciteta kojom bi se opravdala potreba za izgradnjom nove zgrade HMP; - na osnovu koje studije, analize ili stručne procjene je donesena odluka da objekat HMP bude izgrađen izvan ostalih objekata Doma zdravlja i ko je izradio tu analizu; - postoji li procjena rizika i dodatnih troškova uzrokovanih fizičkim razdvajanjem HMP od dijagnostičkih i specijalističkih službi koje su joj neophodne za rad (RTG, laboratorija, specijalističke ambulante i dr.); - zašto se ne razmatra racionalnija, značajno jeftinija i brže izvodiva opcija obnove i proširenja HMP u postojećim kapacitetima Doma zdravlja?

**Mirnes Pipo:** je postavio vijećničko pitanje zašto se kontinuirano krše odredbe Poslovnika o radu Općinskog vijeća Kakanj koje jasno propisuju obavezu blagovremenog odgovaranja na vijećnička pitanja i inicijative, te ko konkretno snosi odgovornost za ovaj oblik netransparentnog i neodgovornog postupanja? Uz navedeno je tražio da mu se u odgovoru dostavi detaljno obrazloženje razloga zbog kojih pojedina vijećnička pitanja i inicijative ostaju bez odgovora duži period ili uopće ne budu uzeta u razmatranje, te da li postoji razlog selektivnom pristupu prema vijećnicima, posebno prema opozicionim, kada se radi o odgovaranju na pitanja koja otvaraju neugodne ili osjetljive teme od javnog interesa. Također, pitao je koje su konkretne radnje koje će predsjedavajući Općinskog vijeća i nadležne općinske službe poduzeti kako bi se u budućnosti osiguralo poštivanje Poslovnika i otklonila praksa koja narušava transparentnost rada rada Vjeća.

**Predsjedavajući (odgovor):** je upitao vijećnika Pipo gdje vidi odgovornost predsjedavajućeg Vijeća i na temelju čega tvrdi da on i sekretar Općinskog vijeća selektiraju pitanja? Svako pitanje i inicijativa koji dođu u Stručnu službu za poslove Općinskog vijeća se obrade i prosljede onome kome su upućeni, a kad Služba zaprimi odgovor prosljeđuje ga svim vijećnicima. Rekao je da odgovorno tvrdi da on kao predsjedavajući Općinskog vijeća i Stručna služba za poslove Općinskog vijeća svoj posao rade profesionalno u skladu sa Statutom Općine i Poslovníkom o radu Općinskog vijeća, pa čak kada neko pitanje ili inicijativa ne budu adresirani na pravu adresu, to se koriguje i isto se prosljedi nadležnima na odgovor. Smatra da nije korektno što je pitanje upućeno njemu i Stručnoj službi, jer on nema mehanizam da nekoga natjera da odgovori na postavljeno vijećničko pitanje ili inicijativu.

**Mirnes Pipo:** je kazao da nije imao namjeru prozvati predsjedavajućeg za selektiranje pitanja, nego je tražio od njega, kao nekoga ko je veza između vijećnika i službi, te općinskog načelnika, da poduzme neke mjere kako bi se poštivali poslovnički rokovi za odgovore na postavljena pitanja i inicijative, iako je svjestan da Statutom i Poslovníkom o radu Općinskog vijeća to nije propisano.

**Predsjedavajući (odgovor):** je rekao da je pitanje upućeno predsjedavajućem, a ako je vijećnik Pipo mislio drugačije onda je isto trebalo uputiti onima od kojih nije dobio odgovor (nadležne službe, javna preduzeća, javne ustanove i dr.). Još je rekao da on koristi sve mehanizme propisane Poslovníkom i Statutom, ali da u konkretnom slučaju nema mogućnosti da bilo kako djeluje.

Predsjedavajući je konstatovao da je vijećnik Edin Šljivo postavio vijećničko pitanje bez korištenja govornice.

**Edin Šljivo:** je postavio dva vijećnička pitanja. Prvo pitanje je iz kojeg razloga se ne postupi po aktu Federalne uprave za geodetske i imovinsko-pravne poslove koja je poništila rješenje nadležne službe Općine Kakanj u predmetu broj: 07-27-8-2404-24 od 16.05.2025. godine, kojim se nalaže da prvostepeni organ ponovo odluči u korist lica koje je izjavilo žalbu Federalnoj upravi? Drugo pitanje je kada građani, odnosno stanovnici u općine Kakanj mogu očekivati rješavanje aktuelne problematike oko javnog prevoza i prevoza učenika od kuće do škole i obrnuto?

### **Vijećničke inicijative**

**Armin Bašić:** je pokrenuo dvije vijećničke inicijative. Prva se odnosi na inspekcijski nadzor i utvrđivanje djelotvornosti praonice za teretna vozila na PK „Vrtlišće“, te izgradnju posebne trase kroz PK „Vrtlišće“ koja bi bila nasuta adekvatnim materijalom i kojom se ne bi kretala vozila iz eksploatacionog područja Rudnika. Razlozi za inicijativu su ogromne količine blata koje nanose teretna vozila koja rade na dopremi sirovine za TC Kakanj, zatim katastrofalni uslovi za život uz tzv. Industrijsku cestu, kao i ogromne količine prašine u periodu sušnog

vremena. Druga inicijativa je za inspekcijski nadzor izgrađenog puta na potezu od mosta Hrasnice pored vidikovca Hurije do mjesta Trijepće u MZ Koprivnica, radi utvrđivanja postojanja projektne dokumentacije i urbanističke saglasnosti za izvedene radove. Razlozi za podnošenje inicijative su ugrožavanje sigurnosti mještana naselja Hrasnice i ulice 25. novembar, zatim ugrožavanje materijalnih i poljoprivrednih dobara, te ugrožavanje bezbjednosti saobraćaja, a sve usljed lošeg ili nikakog projektovanja, pri čemu je sva odvodnja svedena u lokalni odvod koji nema kapacitet da primi sve oborinske vode i suspendovani materijal koje nose.

**Dževdet Huskić:** je pokrenuo dvije vijećničke inicijative. Prva je za rješavanje infrastrukturnih problema sa kojima se susreću stanovnicima ulice Milski put u MZ Doboj. Naime, predmetna ulica se nalazi ispod dobojskog mosta uz desnu obalu rijeke Bosne i već godinama se mještani iste osjećaju zapostavljeno od strane općinske administracije. Ugradnja LED rasvjete je bila planirana u projektima za 2021. godinu i još uvijek nije završena. Poseban problem mještanima predstavlja i svaka jača kiša ili topljenje snijega kada dolazi do rasta vodostaja rijeke Bosne, što dovodi do plavljenja ulice ispod mosta i otežane ili obustavljene cestovne komunikacije. Druga inicijativa je za pristupanje izmjeni prostornog plana Općine Kakanj, u smislu zaštite prirodnog i kulturno-historijskog područja kod naselja Mioči. Razlozi za inicijativu su što, prema informacijama lokalnog stanovništva, se u blizini nalaze: izvori tople vode koji nisu u potpunosti istraženi niti valorizirani, ostaci starog bogumilskog groblja, turbe nepoznatog porijekla i vremenske gradnje, kao i izvori termalne vode Tičići, što sve ukazuje na kulturno-historijski i turistički značaj ovog područja koje ima potencijal da se istraži, zaštiti i predstavi javnosti kao dio kulturne baštine Općine Kakanj. Podsjetio je da su isto prepoznali i inicirali mještani MZ Bilješevo, Donji Kakanj, Modrinje, Popržena Gora, Sopotnica, uz podršku NVO „Alternative“ Kakanj, Fondacije atelje za društvene promjene-ACT, Udruženja C.E.K.O.R. i NGG „Za čist zrak“.

**Mirela Kubura:** je pokrenula dvije vijećničke inicijative. Prva inicijativa je za nabavku zaštitnih maski od zagađujućih materija za najugroženije kategorije stanovništva i to na način da Općina Kakanj izvrši nabavku zaštitnih maski sa filterima za najugroženije kategorije građana, koje bi se dijelile putem nadležnih službi i ustanova tokom perioda visoke zagađenosti zraka. Zatim da Općina Kakanj uputi zvanične zahtjeve velikim privrednim subjektima i zagađivačima na području općine za donaciju zaštitnih maski najugroženijem stanovništvu, kao vid društvene odgovornosti i doprinosa smanjenju posljedica zagađenja, te da Općina Kakanj tokom povećanih koncentracija zagađujućih materija u zraku apeluje na korištenje zaštitnih maski putem informativnih kanala i da kontinuirano radi na podizanju svijesti o značaju lične zaštite i uticaju zagađujućih materija na zdravlje stanovništva. Napomenula je da to nije dugoročna mjera, već mali dio kratkoročnih koraka čiji je cilj smanjiti negativan uticaj zagađenja na zdravlje stanovništva. Druga inicijativa se odnosi na pokretanje izrade interaktivne digitalne mape poljoprivrednih proizvođača koji svoje proizvode prodaju na kućnom pragu. Mapa bi prikazivala teritoriju općine sa mjesnim zajednicama i poljoprivrednim gazdinstvima koja se u njima nalaze, a bila bi dostupna putem web stranice Općine. Mapa bi sadržavala osnovne podatke o proizvođačima, a cilj iste je promocija domaće proizvodnje, podrška lokalnim poljoprivrednim proizvođačima, povezivanje proizvođača i potrošača, razvoj ruralnog turizma i lokalne ekonomije. Na navedeni način bi se posebno doprinijelo promociji ruralnih područja, razvoju turizma „kupi lokalno“ i povećanju ukupne potrošnje domaćih proizvoda. Mapa bi se mogla integrisati u turističku ponudu općine Kakanj, gdje bi posjetioci dobili mogućnost obilaska lokalnih gazdinstava, degustacije autohtonih proizvoda i sudjelovanja u poljoprivrednim aktivnostima. Time bi se povećala turistička ponuda općine, ojačao identitet lokalne zajednice, te doprinijelo održivom razvoju. Realizacijom inicijative Općina Kakanj bi postala prva općina u BiH koja uvodi ovakav digitalni alat, čime bi dala primjer dobre prakse drugim općinama i višim nivoima vlasti.

**Rešad Merdić:** je pokrenuo vijećničku inicijativu u vezi pokretanja aktivnosti za izgradnju trotoara u ulici ZPO na dionici od spajanja sa ulicom Alije Izetbegovića (stara jama) do trgovačke radnje "Džejla" Plandište. Predmetna dionica puta ne posjeduje trotoar, a istom se kreće veliki broj stanovnika, posebno djece koja idu u škole.

**Adnan Demir:** je pokrenuo dvije vijećničke inicijative. Prva inicijativa je za povećanje izdavanja sredstava za sufinansiranje boravka djece u privatnim predškolskim ustanovama i to u vidu mjesečne subvencije po svakom djetetu. Cilj inicijative jeste težnja ka izjednačavanju troškova boravka djece u privatnim sa javnim obdaništem. U prilog opravdanosti inicijative stoji i činjenica da ne postoji dovoljan broj mjesta u javnoj predškolskoj ustanovi i da je veliki broj roditelja primoran upisati djecu u privatne vrtiće, čime snose znatno veće troškove. Druga inicijativa je da Općina Kakanj od nadležnih kantonalnih i federalnih institucija zvanično zatraži uspostavu proširene općinske mreže monitoringa kvalitete zraka, uključujući nabavku i instaliranje dodatnih stacionarnih i mobilnih mjernih stanica na područjima u neposrednoj blizini industrijskih postrojenja. Uspostavljanjem sveobuhvatne mreže mjernih stanica omogućilo bi se praćenje emisija u realnom vremenu, jasno utvrđivanje porijekla skokova zagađenja i eliminisanje dosadašnje prakse prebacivanja odgovornosti među glavnim zagađivačima. Cilj inicijative je da Općina Kakanj, uz podršku nadležnih viših nivoa vlasti, dobije alat za insistiranje na utvrđivanju odgovornosti i preduzimanju mjera protiv zagađivača, a na osnovu transparentnih i verificiranih podataka. Krajnji i najvažniji cilj jeste zaštita građana kroz osiguranje osnovnog ljudskog prava na život bez zagađenog zraka.

**Mirnes Pipo:** je pokrenuo vijećničku inicijativu za postavljanje stacionarnog radara na regionalnoj cesti Kakanj-Zenica kod skretanja za naselje Tičići. Na predmetnoj dionici su vrlo česte saobraćajne nesreće na mjestu priključka naselja Tičići na regionalni put. Prilikom uključivanja je slaba preglednost, te uz to mnogi vozači se ne pridržavaju ograničenja brzine. Do sada je bilo desetine nezgoda sa štetom, ozljedama i pitanje je vremena kada će doći do nezgode sa nesagledivim posljedicama.

Predsjedavajući je konstatovao da su vijećnici: Sanel Šabanović, Senad Softić, Mensur Čehajić i Edin Šljivo podnijeli vijećničke inicijative bez govornice.

**Sanel Šabanović:** je pokrenuo dvije vijećničke inicijative. Prva je za postavljanje kamera videonadzora na lokaciji Park prijateljstva u Kaknju. Predlaže postavljanje kamera na ključnim tačkama parka, uključujući centralnu zonu, prilazne staze, dječije igralište i dijelove s većom frekvencijom građana u večernjim satima. Razlozi za inicijativu su što Park prijateljstva predstavlja jednu od najposjećenijih javnih površina u Kaknju, koju koriste djeca, mladi, porodice i starije osobe, a građani izražavaju zabrinutost zbog povremenih narušavanja reda, oštećenja javne imovine i nedovoljno osvijetljenih dijelova parka. Druga inicijativa je za poboljšanje rasvjete u Parku prijateljstva u Kakanj. Obzirom da je Park prijateljstva jedna od najfrekventnijih javnih prostora u Kaknju kojeg svakodnevno koriste djeca, mladi, porodice i starije osobe, potrebno je izvršiti zamjenu dotrajalih i postavljanje novih rasvjetnih tijela na mjestima smanjene vidljivosti. Mjere bi doprinijele većoj sigurnosti građana, posebno mladih i djece, smanjenju vandalizma i ugodnijem ambijentu.

**Senad Softić:** je pokrenuo dvije vijećničke inicijative. Prva je za planiranje izgradnje zaštitne ograde na rizičnim dionicama saobraćajnica u MZ Slapnica iz sredstava Budžetu Općine za 2026. godinu i to: - izgradnja zaštitne ograde u naselju Slapna Gora u dužini od cca 75 m, na dionici lokalnog puta poznatog kao „Andrića Gaj“; - izgradnja zaštitne ograde na ulazu u naselje Slapnica u dužini od cca 100 m, od lokaliteta poznatog kao „Šimkine kuće“. Na navedenim dionicama se nalaze izrazito rizični dijelovi puta sa oštrim padinama i velikim visinskim razlikama između kolovoza i okolnog terena. Tim putevima se svakodnevno kreću putnička vozila, djeca, pješaci, poljoprivredna vozila iz okolnih proizvodnih pogona, poljoprivredna mehanizacija i teretna vozila. Uslijed klizanja tla, nepreglednih krivina i

nedostatka osnovnih saobraćajnih elemenata zaštite, postoji ozbiljna opasnost od izlijetanja vozila i povređivanja učesnika u saobraćaju. Postavljanjem zaštitne ograde značajno bi smanjili rizik saobraćajnih nezgoda, slijetanja i doprinijeli sigurnosti stanovnika. Druga inicijativa je da se u budžetu Općine Kakanj za 2026. godinu planiraju sredstva u poljoprivrednoj proizvodnji u segmentu podsticaja za animalnu proizvodnju i to: - tov junadi; - tov rasplodnih junica; - uzgoj ovaca. Razlog podnošenja vijećničke inicijative je u tome što se na području općine Kakanj veliki broj domaćinstava bavi tovom junadi, tovom rasplodnih junica, kao i ovčarstvom, a za to nije predviđen nikakav podsticaj, što je neshvatljivo ako se teži razvoju poljoprivrede.

**Mensur Čehajić:** je pokrenuo dvije vijećničke inicijative. Prva je za sanaciju dijela puta kod OŠ „Hamdija Kreševljaković“ Kakanj nakon izvršenih radova na zamjeni dotrajale instalacije grijanja. Tokom izvođenja radova došlo je do isjecanja dijela asfalta, a nakon završetka radova površina nije adekvatno sanirana što uzrokuje neravnine, otežano kretanje vozila i povećan rizik od oštećenja automobila, posebno u nadolazećem zimskom periodu. Druga inicijativa je se odnosi na sanaciju raskrsnice u MZ Plandište prema ulici 9. maj. Navedena raskrsnica je već duže vremena u lošem stanju, nakon što su radnici JP „Vodokom“ vršili iskopavanje i isjekli asfalt, a nakon završetka radova ista nikad nije vraćena u prvobitno stanje, odnosno nije adekvatno sanirana (isječeni dio asfalta uzrokuje neravnine, otežano kretanje automobila na raskrsnici za skretanje prema ulici 9. maj). Raskrsnica je veoma frekventna i predstavlja izrazito rizičnu tačku u saobraćaju, naročito u večernjim satima i periodu lošeg vremena.

**Edin Šljivo:** je pokrenuo vijećničku inicijativu da se izvrši uklanjanje niskog rastinja, grmlja i grana, odnosno izvrši prokres u dužini do 60 metara u ulici 1. mart u MZ Povezice. Stanovnici tog dijela naselja, tačnije od firme „Eldin komerc“ prema Zli brijegu, ističu slaba preglednost zbog grana i grmlja koja se sve više nadvilo na putni pravac što oštećuje i sama vozila, te ugrožava sigurnost saobraćaja i stanovnika/pješaka koji se kreću tim pravcem.